

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“E teie nei, inaha, tera te faaue ta'u e horoa'tu ia outou, eiaha outou e faatia ma te ite i te taata ia rave i tau tino e tau toto ma te au ore, a opere ai outou i te reira.” *Buka a Moromona, III Nephi 18: 28.*

Nu. 14.

Novema, 1912.

Mat. 5.


Te Amuraa Maa a te Fatu.

(TUATIRAA.)

[A faatia atura te Mesia i te oroa i te pô i haavarehia mai ai oia, ua faaamu oia i ta'na mau pîpî i te pane, e ua faainu atoa ia ratou i te uaina. E ua tamau noa te Ekalesia i te haapao i taua faaue a te Fatu, e tae noa'tu i te taima i faahuru-ê-hia e te feia taiva ma te faahapa i te faaue-raa a te Fatu. I reira ua haamata taua ohipa o tei tapea i te au'a na te mau orometua ana'e, mai te faahapa papu i te faaue o tei na ô maira e, “Ua rave ihora oia i te au'a, haamaitai atura i te Atua, na ô atura, A rave mai i teie a tufana outou.” Luka 22: 17. A hi'o atoa i Ioane 6: 53:

“Ua parau maira Iesu ia ratou, Amene, amene, e parau atu vau ia outou, Ia ore outou ia amu i te tino o te Tamaiti a te taata nei, e ia ore hoi ia inu i to'na toto, aore ia e ora i roto ia outou.”

Ua haapii atoa taua feia taiva ra e, e na roto i te pure, ua faarirohia te pane ei tino mau no Iesu; e ua riro te uina ei toto mau no'na. Aore ia teie i au i te parau a te Atua; e pane mau te pane. e e uaina mau te uaina. Ua na ô maira



OLIVE TAUDERE.

Ua fanau oia i te 3 no Atopa, 1806, e ua pohe i te 3 no Mati, 1850. O oia te hoê o na ite tootoru i te Buka a Moromona. Ua riro Olive Taudere ei papai parau na Iosepha Semita i te matahiti 1829, a iriti ai Iosepha i te Buka a Moromona.

Te Parau Tuatapapa no
Iosepha Semita.

(TUATIRAA.)

PENE XXVI.

MATAHITI 1837-38.

Ua haere atura Iosepha i te fenua ra, i Canada. Hopoi atura oia ia Sidine Ritidone na roto i te tahi vahi pape ia ore raua e hamani-ino-hia e te enemy. Hi'a ihora te tahi mau taata toroa i te hara. Ua haere oioi atura te Peroppheta i Missouri. Hurihia ihora Davida Vitima, raua o Olive Taudere i rapae i te Ekalesia.

A TUPU noa'i teie nei mau mea faufaa rahi i te fenua ra, i Beritane, faarue ihora Iosepha, ratou o Sidine Ritidone, e o Toma B. Marasa i Ketelani, e haere atura ratou i te fenua ra, i Canada. Ia tae atura ratou i te tahi na maile, i te oire ra, i Paineville, faafîfîhia ihora ratou e te enemy, o tei aratai atu ia ratou i mua i te haavâ, ia haavâhia'i ratou i te tahi mau pariraa haavare. Ua parau atura te mutoi rahi ia Anasona Cala, te hoê taeae e, "Aita roa matou i hinaaro ia faarue atu to outou Peroppheta i Ketelani, e eiaha roa'tu ona e haere." Aufau ihora Anasona i e hoê tausani, e hitu hanere dara ia ratou na Iosepha, e i te mahana i muri iho, haere tiamâ atura ratou. Ua tere ratou na nia i te hoê pahi auahi, i nia i te roto rahi ra, i Erie, e taoto ihora i nia i te tahua pahi; ua maitai roa râ ratou, e taoto ihora ratou ma te hau.

Te oaoa noa ra ratou i to ratou haerea i rotopu i te mau amaa no te Ekalesia i Canada, e farerei atura ratou ia Ioane Tela e i te tahi atu mau Feia Mo'a. Ia ho'i faahou maira ratou i te pae muri no Atete, haere maira Iosepha raua o Sidine, na nia maira i te tahi pereoo puaahorofenua, mai te oire ra, i Bufalo mai, e tae noa maira i Paineville. A tamaa noa'i raua i roto i te fare no te hoê taata, o tei paruru atu ia

Iosepha i te ture i te hoê taime, o Bisela to'na i'oa, ite ihora raua i te nuu rahi enemi i tairuruhia i rapae au i te fare ra, e ua itea-vave-hia e, o te taparahi taata ia to ratou opuaraa. E hoa maitai mau ia o Bisela, e ua tuuhia ihora raua i rapae i te fare, e haere atura na te tahi e'a i muri iho i te fare. Ia iteahia e, ua reva Iosepha raua o Sidine, tutui oioi atura te enemi i te tahi mau auahi, ei haamaramarama ia tauturu atu ia ratou i to ratou imiraa ia raua, area râ haere atura raua na roto i te vahi pape e te vari, e riro ihora teie nei mau auahi ei tauturu ia raua i te imi i te e'a maitai.

Ua mauui o Sidine, e no reira maoro iti a'era, rohirohi roa ihora ona, e hopoi ihora te Peropheta ia'na i nia i to'na tua, na roto i te vari e te pape i te mau maile e rave rahi. Auê te aroha rahi no taua Peropheta ra e! Ua tae atura raua i Ketelani ma te peapea ore i te pô roa, ei te mahana i muri iho, oia hoi i te Sabati, a'o atura Iosepha i te parau faufaa rahi roa i te Feia Mo'a i reira.

Ia tae atura te Peropheta i Ketelani, oto ihora ona i te mea e, ua puai te varua no te taivaraa i reira, e hi'a ihora te tahi mau taata toroa i roto i te hara. I te mahana 3 no Setepa, ua hurihia na Aposetolo e tootoru i rapae i te Apose-toloraa, oia hoi o Limana e o Luka Ionasona, e o Ioane F. Boanotona, e aita i farii-faahou-hia Federika G. Wiliama ei tauturu ia Iosepha. I taua amuiraa ihora, ua fariihia Olive Tautere, e o Haeramu Semita, e o Ioane Semita, e o Iosepha Semita (tupuna), ei na tauturu i te Peropheta. I te hebedoma i muri a'era, fa'i ihora teie nei na Aposetolo e tootoru i ta ratou mau hara, e ua farii-faahou-hia ratou ei na Aposetolo; e mea paruparu roa râ ta ratou tatarahapa.

I roto i te avae Atopa, tere atura Iosepha, raua o Sidine i Missouri e farerei i te Feia Mo'a i reira, e e maiti i te tahi mau vahi ei faaearaa na te mau taeae e to ratou mau utua-fare, o tei tae mai, no ô mai i te pae i te hitia o te râ, no te mea ua fatata roa te taime ia haaputuputu-maite-hia te Feia Mo'a i te vahi hoê. Ua haapaohia te hoê amuiraa i te maha-

na 7 no Novema, i muri iti a'e i to raua taeraa mai i Fa Wese, e aita te Feia Mo'a i Missouri i farii ia Federika G. Wiliama, e ua maitihia Haeramu Semita ei tauturu piti ia Iosepha.

Ua tae atura te Peropheta i Ketelani i te avae Ditema, e e mea ri'ari'a roa te peapea i reira. Ua opua maite ihora Varene Parisa, ratou o Ioane F. Boanotona, e o Luka Ionasona, e o Iosepha Coe, e te tahi atu â mau taata i te haamou i te Ekalesia. Ua farii ihora teie nei mau taata i te mau orama hanahana hau ê, e teie nei ua faarue ê atura ratou i te faaroo e ia Iosepha, e parau atura ratou e, e Peropheta haavare ia oia. Ua ati maitai ihora râ o Birikama Youne, e te tahi atu mau taeae parau-tia ia'na, e parau atura ratou e, ua ite papu roa ratou, na roto i te mana o te Varua Maitai e, o te Peropheta mau ia Iosepha na te Atua. Na teie i faatupu i te hamani-ino-raa i nia ia ratou, e ia haere oioi atu Birikama e tia'i, ia ore ona e taparahihia.


I te pô roa, i te mahana 12 no Tenuare, 1838, faaineine ihora Iosepha raua o Sidine i to raua na puaahorofenua, e faarue atura i Ketelani. Haere noa'tura raua i roto i taua pô toetoe roa ra, e aita roa i faaea, e riro paha te area i haerehia e ono ahuru maile i ropu ia raua e to raua mau enemi. Ua tiaia raua i te taeraa mai o to raua na utuafare, ei reira haere faahou atura ratou. Ua auau noa'tura te mau enemi no Ketelani ia ratou e piti hanere maile te area; ua faafîfîhia râ ratou e te Fatu, e haere maite atura Iosepha ma te peapea ore, e tae atura ratou i Fa Wese e piti avae i muri iho. Ua haere mai te tahi mau taeae e piti ahuru maile e farerei mai i te Peropheta, e e faaaratai atu ia'na i Ziona.

I te pae i te tooa o te râ, mai i te hitia o te râ i te huru, hi'a noa ihora te tahi mau taata toroa i te hara. I muri iti a'e i to Iosepha haereraa mai i Missouri, hurihia ihora Olive Taudere, ratou o Davida Vitima, e o Limana Ionasona, e o Viliamu E. MaKelena i rapae i te Ekalesia. Ia hurihia teie nei

mau taata, e o Luka Ionasona raua o Ioane Boanotona, ua hurihia iho â na ite e toopiti i te Buka a Moromona, e e toomaha Aposetolo i rapae i te Ekalesia. Maoro iti a'era, i te mahana 8 no Tiurai, ua parauhia Ioane Tela, e o Ioane E. Page, e o Virifora Vudurufa, e o Viriadi Ritedi, na roto i te tahi heheuraa, ei na Aposetolo, e ei mono i tei hurihia i rapae.

I roto i te tau mahanahana, rave puai noa ihora te Peropetha i te chipa, i te faatiaraa'tu i te mau amaa rarahi, e i te tautururaa'tu i te Feia Mo'a, o tei tae mai, no ô mai i Ketelani, no te ati rahi e te peapea i reira. I te 6 no Tiurai, faarue atura e pae hanere, e hoê ahuru ma pae Feia Mo'a i Ketelani, e haere tia'tura i Missouri, i raro a'e i te faatere-raa o te mau pŭpŭ Hitu Ahuru. Ua neneihia e Iosepha te tahi vea i Fa Wese, i te avae Tiurai, e i taua avae ihora ua horoahia maira e te Atua te ture rahi no te tufaa ahuru i te Feia Mo'a, e te hinaaro noa nei â te Atua ia haapao tatou paatoa i taua ture rahi ra.—OLE PETESONA.

(E tuatihia mai teie parau.)



TE ANAVAI RA O IORIDANA.

Te Taata Paniola.

TE vai nei te tahi mau taata i te fenua ra, i Colorado, i Amerika. E huaai ratou no te mau taata Paniola, o tei tae mai i teie nei fenua, i te taeraa matamua o te papaa i te fenua Amerika. Ua parahi ihora teie nei mau papaa Paniola i te fenua Amerika, e ua faaipoipo ratou i te mau vahine maohi no te fenua, oia hoi te mau Inidia ra. No reira ua rahi te mau tamarii afa, e ua riro ratou ei nunaa êê i to ratou hui tupuna, e te faaea nei teie nei mau taata i te fenua i fanau mai ai ratou, e ua riro ratou e taata mau no te fenua. E mau taata haapao, e te roo maitai hoi ratou.

Ua haere te hoê orometua Moromona, o Lewis Sowards to'na i'oa, i rotopu ia ratou, e ua haapii atu ia ratou te Evanelia a Iesu Mesia. I reira ua putâpu to ratou aau i te parau mau, e haamana'o ihora hoi ratou i te parau a Petero, o tei na ô maira i te mau taata i te oire ra, i Ierusalem, A tatarahapa, e ia bapetizohia outou e tia'i. Ua faarue ratou i to ratou faaroo tumu, oia hoi te Katolika, e ua amui mai ratou i te Ekalesia a Iesu Mesia i te Feia Mo'a i Mau Mahana Hopea Nei. Te mau noa nei â ratou i te reira faaroo ma te mana'o papu e, e poe tao'a rahi tei noaa mai ia ratou ra.

A na reira hoi tatou i te imi i te parau mau, e ia itea, tapea maitai. A hi'o i te huru no te mana'o o te taata aau maitai, e e tiaturi tatou i nia i te taata roo maitai, eiaha râ i nia i te taata haapao ore. Ia ora na outou.

—Papaihia e Aarona.

Parau Faaite.

Te ani atu nei Te Heheuraa Apî i to'na mau hoa, o tei ore i aufau i to ratou moni, ia aufau ratou i teie nei. Te mau taata o te ore e aufau ia tae i te Matahiti Apî, e tapuhia to ratou i'oa.

Te Mau Parau Api.

U A pohe te urî na te hoê taata ona i Niu Ioka, e ua hunahia te reira urî. Ua mauâ e 1,000 dala i taua hunaraa ra.

Ua haavâ-faahou hia te taata ra o Fareava, o oia tei pupuhi pohe roa i te hoê taata i Raiatea. To'na utua hopea e 10 ia matahiti i roto i te fare tapearaa.

Te faaite atu nei Te Heheuraa Apî e, ei te avae Ditema e operehia e mau kalena apî no te matahiti 1913. E tao'a aroha teie nei mau kalena i te mau hoa o te vea.

I te hoê oire rahi i Amerika, o Brooklyn te i'oa, ua apoo e 200 taote, e ua faaau ratou i te faaauraa, i te na ôraa e, ia pohe roa ratou e horoahia to ratou mau tino pohe i to ratou mau hoa taote ia atorehia, e ia tapupuhia, ia iteahia te ma'i i pohe ai ratou ra.

Te opua nei te Ekalesia ia faatia i te hoê hiero i te fenua ra, i Canada, i Amerika, ia tia ia faaoti ohie i te ohipa no taua mau taata ra i tera pae, i roto te tahi hiero o te Fatu. Te opua atoa nei te Ekalesia e, ia oti te hiero i Canada, ei reira e faatiahia te tahi atu â mau hiero i te tahi atu mau fenua. E ere ia teie nei mau hiero e mau fare pureraa.

I te 12 no Setepa, ua hunahia te Emepera no Iapone, e ua pau e toru mahana i te ohipa hunaraa, e a pupuhi ai te faehau i te aroha hopea i te Emepera, ei reira ua faaau te raatira rahi o te mau faehau Iapone, oia e ta'na vahine atoa. E peu tahito roa te reira, oia hoi ia taparahi te feia toroa ia ratou iho ia pohe to ratou Emepera. I to tatou hi'oraa e peu maamaa ia.

E mea ri'ari'a ia mana'o te rahi o te feia i pohe i te ohipa faatere pahi reva. E maha noa iho te matahiti o taua ohipa ra, e mai te haamataraa ua pohe roa e 187 taata. E 73 taata i pohe i te matahiti i mairi a'enei, e i teie nei â matahiti, ua pohe e 77 taata. I te 20 no Setepa, ua pohe e toru taata i taua mahana ihora. No te rahi o te mau taata i pohe, ua opani te hau Purutia te hoê ia huru pahi reva, eiaha te reira huru e faahorohia. E maha vahine i pohe i taua ohipa ra.

E taime maoro i teie nei, ua opua te hau Farani i te tapea i to tatou mau moni veo nei, oia hoi te hoê peni, e te piti peni, oia hoi te 5 tenetima, e te 10 tenetima. Te na reira nei te hau, no te mea ua au ore te moni teiaha mai tera te huru. Te opua nei ratou ia horoa mai i te moni uouo mai to Amerika te huru. Ua oti te tahi o teie moni apî, e ua parauhia e, e mea nehenehe; to'na hiti e huru meumeu rii, e e apo tei ropu i te moni. Ua parauhia e, e operehia taua moni ra i te matahiti 1913.

Te titau nei te hau Heleni, na roto i to'na mau Tonitera Heleni i te mau fenua, ia ho'i te mau taata Heleni i to ratou fenua ai'a, e tauturu atu i te tama'i i Turekia.

Ua faataa te hau Amerika i te moni, e hoê ahuru ma pae milioni dala (15,000,000), no te hamaniraa i te hoê pahi rahi roa, e pahi manuâ. O teie nei pahi, o te pahi ia hau a'e i te rahi e te puai i te ao nei.

Ua faatere te hoê taata Farani, o Pierre Daucourt to'na i'oa, i to'na pahi reva, mai te hora i hiti mai ai te mahana, e tae roa i te mairiraa o te mahana. Ua pau ia'na i taua mahana ra e 570 maile, oia hoi mai i 8 nei i Papeete nei e tae roa'tu i te fenua ra i Takaroa, e te ho'iraa mai. No taua ohipa maere ra, ua roaa mai i taua taata ra te hoê rê maitai.

Ua tapeahia te hoê hui arii no te fenua ra, o Paniola, ia ore ona i tae atu i Amerika. Tera te tumu i tapeahia'i ona, a parahi ai oia i Parisa, i Farani, i na avae a'enei, ua tamata oia ia faaaau ia'na iho, aita râ oia i manuia. Ua parauhia e, e taata pere oia, e e rahi to'na mau peu faufau. Ua faaho'ihia ona i te fenua no reira mai oia.

Ua haere te hoê pahi hopu no Beritane i raro i te moana, e ia haere mai oia i nia, ua û mai te hoê pahi no Amerika, e ua parari ihora taua pahi hopu na ropu, e ua pohe roa 15 taata, e e hoê noa iho tei ora. O te 6 teie o te mau pahi hopu no Beritane i moe. I na avae a'enei, ua moe'atoa te hoê pahi hopu no Farani, o La Manche to'na i'oa, e ua pohe i taua pahi ra e 27 taata.

I te 15 no Atopa, ua pupuhihia te peresideni tahito no te hau Amerika. Ua faaineine oia ia haere i te hoê fare teata e arero atu i te hoê tiaa rahi roa o tei tairuru e faaroo ia'na. Ua pou oia i nia i to'na pereoo uira, e a tia'i oia i nia e aroha'tu i te mau taata, ei reira ua pupuhihia oia. E taata maamaa tei pupuhi mai, e ua tano roa te ofai i to'na mafatu, e ahiri aita e hoê puohu parau i roto i to'na pute pereue, ua pohe roa ona. Ua tapeahia te taata tei pupuhi mai ia'na i roto i te fare auri.

Ua pohe te vahine no te hoê taata, e ta raua tamahine aruaru atoa i te ma'i, e ua tiihia mai te taote, e na te taote e faaue atu i taua taata ra e haere e hoo i te raau i te fare raau ma'i. Ua haapao taua taata ra, mai te taote i faaue mai ia'na, maori râ, aita i taa maitai te raau no te vahine, e no te aiû, e ua faainu i te raau no te vahine i te aiû, e ua pohe roa te aiû. No te ma'i rahi no te vahine ua tapeahia, eiaha ia faaitesia, ua pohe ta'na tamarii. E raau paura uouo na raau e piti, e no reira aore i taa maitai te tahi i te tahi.

E haapaohia te Amuiraa Eperera i te fenua ra, i Hao, e ua mana'ohia e, e tomohia te fare pureraa apî i reira. Eiaha te feia Ekalesia e faa-
taupupu i te imiraa i te ravea, e tae atu ai i taua amuiraa ra.

Ua mana'ohia e, eita e maoro e ore roa te basileia ra o Peresia. Te
huru, e riro te tahi pae no taua fenua ra i Rusia, e te tahi pae i Beritane.
Ua parauhia i roto i te vea no te fenua roa mai e, e vahihia taua fenua ra i
te Liona e te Bea, no te mea ua faaauphia o Beritane o te Liona ia, e o
Rusia o te Bea ia. E faaaauraa tahito roa ia teie.

Tera mai te parau apî hopea no te tapuraa i Panama. I te 14 no
Setepa, i faaite papu mai nei te feia mana no te hau Amerika e, ei te pae
hopea no te matahiti i mua, oia hoi te matahiti 1913, e oti roa taua e'a
pahi ra, e e tere te mau pahi na taua tapu ra. I te matamua ua mana'ohia
e, e oti taua ohipa ra i te matahiti 1915, i teie nei râ, no te manuïa maitai
o te ohipa, e oti i teie nei matahiti i mua. Tera te faito no taua ohipa rahi
ra, oia hoi, e 50 maile te roa, e e 500 pie te aano, e e 55 pie te hohonu. E
tae atu hoi te e'a i nia i te hoê aivi. Tera mai te ravea e faateiteihia'i te
mau pahi i nia. E hamanihia te hoê nanai aua ofai, mai te piha nei te
huru aore e tapoi, mea teitei a'e te tahi i te tahi, e e na opani auri e piti
i te tahi pae e i te tahi pae o taua mau aua ra. E tere noa te pahi mai te
moana, e tae roa i te vahi i haamata'i te aivi, ei reira e tomo te pahi i roto
i te aua matamua, e e opanihia te na opani auri i muri iho ia'na. Ei reira
e faaïhia taua aua ra i te pape, e na te pape e faateitei i taua pahi ra i nia
ia tia ia'na ia tere i roto i te piti o te aua ofai ra. Ia tae te pahi i roto i te
piti o te aua, e opanihia te na opani auri i muri iho ia'na, mai tei ravehia i
te aua matamua, e e faaïhia te piti o te aua mai i te matamua te huru, e e
na reira ratou ia tae te pahi i nia roa, e mai te reira atoa te ravea e tuuhia
te pahi i raro i tera pae mai o te aivi. Tei nia iho i taua aivi ra te hoê
roto rahi, e 25 maile te roa, e no reira mai te pape e faaïhia'i taua mau aua
rahi ra. E taime poto roa, e ua i roa taua mau aua ofai ra, e no reira e
e vitiviti maitai te ohipa, e e haere noa te mau pahi ma te taupupu
ore. Ua parauhia e, e tia ia haere e 75 pahi rahi na roto i taua e'a ra i te
mahana hoê. O te 15 no Atopa, i te matahiti 1913, o te mahana ia i faa-
taahia no te tomoraa o taua e'a pahi ra. Na te hoê pahi manuâ a te hau
Amerika e na mua i te haere na taua e'a ra.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.